

Uunga siunnersuut: Takornariatitsinermut, sumiiffinni nunami aalajangersimasuni zone-nut agguaasarneq il.il. inuussutissarsiutigalugu ingerlatsinermi aammalu killeqartumik sumiiffiit ilaanni angalaarsinnaaneq pillugit Inatsisartut inatsisaat
(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Pingajussaanneerpeqarnera

Inuussutissarsiornermut Aatsitassanullu Ataatsimiititaliap isumaliutissiissuteqarnerannut aammalu inatsimmik takornariatitsinermut maleruagassiiiviusut nunatsinni siullersaannik peqqissaartumik suliarinninnerannut Naalakkersuisut qutsavigaat.

Inatsimmik pisariaqartitsineq ukiorpassuit ingerlaneranni, kisianni pingaartumik ukioq manna inatsisissamut siunnersuutip aalajangersimasup saqqummiunneqarnerani annertuumik oqallisigineqarsimavoq. Inatsisip suliarineqarnerata ingerlanera tamaat inatsisissatut siunnersuummi iluaqutissartaasut ajoqutissartaasullu pillugit malunnaatilippassuit oqariartuutigineqarsimapput. Ataatsimoorluta nutaamik inatsisiliortussaansinni taamaattariaqarpoq. Naggataatigut Inatsisartut nunatsinni inatsisiliortutut inatsisissatut siunnersuut suliarisussaavaat. Kisianni tamanna pitinnagu najukkani politikerit, kattuffiit inuussutissarsiornermilu suliaqartut isummatik anittussaavaat.

Apeqqut ataaseq pingaartumik oqallisigineqarsimavoq. Tassani pineqarpoq takornariatitsinermut ingerlatseqatigiiffiit najukkaneersunit pigineqarnissaat pillugu piumasaqaat. Takornariatitsinermut suliffeqarfiup akuersissummik pissarsisinnaanissaanut 2/3-imik najukkameersut piginnittuunissaannut piumasaqaat, Naalakkersuisut aallaaviatigut siunnersuutigisimagaluarpaat. Tusarniaareernerup kingorna tamatuma inuussutissarsiortut ilaannit annertuumik isornartorsiorneqarmat, Naalakkersuisut allannguutissamik siunnersuuteqarput, taamaalilluni tamatumunnga taarsiullugu piginnittut aningaasaataasa affai sinnerlugit najukkaneersuunissaat piumasaqaataalerluni.

Aallaaviusup, taamaalillunilu 2/3-inik najukkameersut piginnittuunissaannik piumasaqaatip, uterfigineqarnissaa kissaatigalugu Inuussutissarsiornermut Aatsitassanullu Ataatsimiititaliap isumaliutissiissummini saqqummiuppaa. Naalakkersuisut tamanna tunngavigalugu taamatut kissaateqarnermik naammassinnittumik allannguutissatut siunnersuummik suliaqarput.

Ingerlatseqatigiiffiit ataasiakkaat inatsit malinniarlugu piginnittuunerup ilusaanik allanngortitsisariaqalertussaanerannik, allannguut malitseqarsinnaavoq. Inatsimmi piffissaq ikaarsaarfiusussa q ilanngunneqarpoq, tassani iluarsinissat pisariaqartut pisinnaassallutik.

Najukkani inissisimasut piginnittuunissaat pillugu piumasaqaat inatsimmi tunngaviusumi § 73 naapertorlugu suliffeqarfiit piginnittussaataitaneranni taarsiissutitalimmik arsaarinninnerusinnaasoq, siusinnerusukkut tusarniaanermut akissuteqaammi saqqummiunneqarpoq.

Naalakkersuisut soorunami inatsimmi tunngaviusumi aalajangersakkat ataqqivaat, aammalu ingerlatseqatigiiffiit taarsiissutitalimmik arsaarinninnerusoq uppersarsinnaappassuk, tamanna Naalakkersuisut isummerfigissavaat. Naalakkersuisut naliliipput taarsiissutitalimmik arsaarinninnissap aarlerinaateqarnera takorluugaanerusoq aammalu nalinginnaasumik inatsisip sunniutigisussaangikkaa. Inatsisip siunertaangitsumik naapertuutinnigsumillu sunniuteqarnerinik iliuuseqarfiginniffiusinnaasumik, inatsimmi immikkut ittumik akuersissuteqarnissamut aamma aalajangersagaqarnera Naalakkersuisut innersuussutigaa.

Kisianni takornariatitsinerup suliassaqaarfiup ineriartortinnissaanut najukkani inissisimatitsinissaq tunngaviulluinnartumik pingaaruteqartorujussuavoq. Naalakkersuisut takornariatitsinerup annertuunik periarfissaqartoq takusinnaavaat, ukiunilu aggersuni neriulluarnartup tungaanut inuussutissarsiornerup ineriartornissaa qularutiginaq. Inatsisartut aalajangiinerat akuersaarneqassasoq aammalu inuiaqatigiinnut iluaqutaasumik takornariatitsinerup ineriartoqqinnissaanut suliassaq pilersitsiviulluurtumik siunnerfilimmillu ingerlatissagippat, Naalakkersuisut kaammattuutigaat.

Inatsisissatut siunnersuummi matumani piaaraluni imaluunniit mianersuaalliorujussuarnermik takutitsilluni inatsisip unioqqutinneqarneranut pineqaatissiiisoqarsinnaavoq. Aamma annikitsumik mianersuaalliornerup pineqaatissiiigineqarsinnaanissaa siunertaralugu, ataatsimiititaliami amerlanerussuteqartut allannguutissatut siunnersuummik saqqummiussippat. Naalakkersuisut siunnersuut taanna taperserpaat

Takornariatitsinerup inuussutissarsiornerup najukkani inissisimanerata nukittorsarneqarnissaa kiisalu naleqquttunik inatsisiliorneritigut, ilanngullugit akileraartarnerup inatsisini maleruagassat aammalu transfer pricing pillugu aalajangersakkat, najukkani suliaqartuusut illersorneqarnissaat pillugu pilersitsiviulluurtumik inassuteqaataannut Naalakkersuisut ataatsimiititaliaq qutsavigaat.

Taamatut oqaaseqarlutik Naalakkersuisut allannguutissatut siunnersuuttip akuerineqarnissaa inassutigaa.